

**Москва уонна бүтүн Русь Патриарх Баһылыгын КИРИЛЛ
үрдүкү аҕабыттарга, ытык аҕаларга, диаконнарга, манаахтарга,
Нуучча Православнай Танаратын Дьиэтин итэҕэллээх оҕолоругар
Паасханан илдьит суруга**

**Айыы Тойон туһугар тапталлаах
Сибэтиилээхтэн сибэтиилээх үрдүкү аҕабыттар,
ытык пресвитердар, диаконнар, Танараны таптыыр манаахтар,
күндү бырааттарбыт уонна балыстарбыт!**

Аан дойдуну быыһаабыт Айыы Тойоммут өлөн баран тиллибитин кэрэһилиир кэрэмэн килбиэннээх улуу бырааһынньыкка духуобунай үөрүүнэн үөрэн, Кини хоруоптан тахсыбытын өйбүнэн-санаабынан анааран тураммын, эһиэхэ бука барыгытыгар олоҕу туругурдар толору ис күүстээх, кыайтарбат кырдыктаах, үөрүүлээх тыллары туһаайдаҕым буоллун:

ХРИСТОС ТИЛЛИБИТЭ!

Сандаархай сыдыаайдаах Паасха түүнэ киһи аймахха Танара тапталын – Халлааннааҕы Аҕабыт үйэлэр иннилэриттэн баар Уола, киһи айылҕатын ылынан, кинини аньыы-буруй ыарыытыттан үтүөрдүбүтүн уонна, үтүгэн түгэбэр түһэн биһигини өлөр өлүү бохсубут хандалытыттан босхолоон, биһиэхэ Айыы Танарабытын, Олохпутун Онкуллааччыны, кытта биир буолар күндүттэн күндү кыаҕы бэлэхтээбитин, – толору көрдөрбүтэ.

Айыы Тойон тугу барытын бырастыы гынар итинник улууканнаах тапталыгар кытыктанан, биһиги «*дьону утары буолбакка, бу үйэ халың хараңатын дьаһалталарын, былаастарын, баһылыктарын утары, халлаан аннынааҕы хара дьай тыыннарын утары сэриилэһэр*» (Еф 6, 12) кыайтарары билбэт сэптээх-сэбиргэллээх буойуттар буолабыт. Онон, киһи кэбирэх айылҕата барыттан-бары дьиксинэр уйан санаатын кыайаммыт, хайдахтаах да суостаах кэми эрдээхтик көрсөр кыахтанабыт. «*Таптал куттанары билбэт – сиппит-хонпут таптал кутталы кизэр кыйдыыр. Куттанар киһи эрэйи көрөр, кини таптала ситэтэ суох*» (1 Ин 4, 18).

Айыы Тойон биһигини, Кини суолунан иһээчилэри, «*Куттаньмаң!*» диэн бөһөргөтөр, сүргэбитин көтөһөр тыла Евангелиеҕа элбэхтик хатыланара мээнэҕэ буолбатах. Кэлэр кэмтэн, араас суоһуур кутталтан, сымыйата-кырдыга биллибэт үһү-бадах кэнэҕэс иэдээнтэн чаҕыйар санааны үгүстэр бэркэ билэллэр. Ол эрэри бэйэбит эрэ Айыы Тойонтон аккаастамматарбыт, Кини биһигини хаһан да хаалларыа суоҕа. Бу билигин эмиэ, биһиги Кинини, өлөр өлүүнү кыайбыт Айыы Тойону, уруйдуур-айхаллыыр күннэрбитигэр, Быыһааччыбыт биһиэхэ хас биирдиибитигэр туһаайан хат тоһоҕолоон этэр: «*Куттаньма, итэҕэй эрэ!*» (Мк 5, 36).

Онон биһиги сиэрбит-майгыбыт, бу дойду уодаһыннаах быһыытыттан чынха атын буолан, үйэлэргэ өлбөөдүйбэт Дьин Кырдыгы илэ-чахчы бигэргэтэ туруохтун. Төһө да билигин уопсастыба уонна итэҕэл көнүлэ хааччахтамматаҕын иһин, христианныы олох көрдөбүлүн бигэтик тутуһан олорор киһи син биир сүүрүгү утары барар. Онон кини дьон-сэргэ өйүгэр-санаатыгар ингэриллэ сатыыр аһыһыны-хараны уонна ону кытта иллэһэр туругу ылымматын биллэрэр.

Айыы Тойонно хайыһаммыт, биһиги духуобунай өттүнэн уһукта илик чычаас олоҕу, бу дойдуга баһылыыр-көһүлүүр бэйэмсэх быһыыны төлө көтөбүт уонна Тилли кэрэмэн сырдыгын Халлааннааҕы Куоракка тиксэрэр эркээйи быһыытынан ылынар кыахтанабыт.

Бараммат үйэлээх олоххо тардыһар күүһү биһиги Евхаристия биир уопсай иһититтэн сомсобут. Айыы Танара бары өттүнэн сибэтиэй Тыынын илгэлээх үтүөтэ барыбыт дууһабытыгар энчирээбэт или-эйэни, бигэ итэҕэли ингэриэхтин, үчүгэйи хотуулаахтык онорор күүһү-уоҕу биэриэхтин.

Христос Этигэр-Хааныгар тиксэммит, биһиги, Ытык Суруйууга этиллибитин курдук, *Таңара айылгатын кытыктаахтара буолабыт* (2 Пет 1, 4), онон ис хаан айылгыбытын уларытынар күүстэнэбит. Танараҕа тиксэммит, биһиги Киниэхэ, *«Бэйэтин аччатынан, кулут уобараһын ылынан, дьон тэңэ буолбут, киһи курдук көрүңнэммит, Бэйэтин намтатынан, өлүөр да диэри – кириэскэ тириллиэр диэри – истигэн»* (Флп 2, 7-8) Айыы Тойонно маарынныыр үрдүк дьоллонобут.

Сиэр-майгы духуобунай өттүнэн уларыһыта уопсастыба, норуот, дойду олоҕун уларытыы төрдө-төбөтө, сүрүн күүһэ буолар. Ханнык да дьыала, бытархай чаастара чочуллубакка эрэ, толору үчүгэй көрүннэнэр кыаҕа суох. Аҕа дойдубут төһө чөл олохтооҕо араас социальнай, политической бөлөххө киирэр эдэр-эмэн дьон сиэрдээх өйүнэн-санаатынан быһаарыллар. Историческай Русь судаарыстыбаларын, Танара Дьийэтин итиэннэ, киэнник ыллахха, Айыы Танарабыт биһиэхэ, араначчылаатыннар, *«харыстаатыннар»* (Айыллыы 2, 15) диэн, тутгарбыт айылгатын сайдар суола олохпут хайысхата хайдаҕыттан тутулуктаах.

Танараҕа үгэн тураммын, мин эһиэхэ, күндү дьоммор, бука барыгытыгар аад күүһүн самнарбыт Айыы Тойоммутун өйдөөн-санаан өрүү үөрэ-көтө сылдьаргытыгар, күннээҕи үлэҕитигэр-хамнаскытыгар үөһэттэн дэлэй көмөнү ыла тураргытыгар ис сүрэхпиттэн баҕарабын.

ХРИСТОС ДЬИН ЧАХЧЫ ТИЛЛИБИТЭ!

Аминь.

+ КИРИЛЛ

МОСКВА УОННА БҮТҮН РУСЬ ПАТРИАРХ БАҢЫЛЫГА

Христос Паасхата

Москва

2012